

Formasaun animadór sira nian

2015

2

ITA-NIA LARAN LA MANAS bainhira NIA KO'ALIA TUIR DALAN hodi HANORIN ESKRITURA?

(Lk 24,32)

Eskolante sira Emaus nia nia istória bele sai modelu ba itinerariu ida atu bele to'o esperiênsia ksolok Paskua nian. Iha pasajen ida ne'e, Lukas haktuir oinsá ema sarani ida (ita) bele sai husi terus, laran-todan, difikuldade sira, to'o ksolok no laran manas atu haklaken Maromak nia Liafuan liuhusi akompañamentu ida ne'ebé lori ita ba fiar metin.

Bainhira ita-nia fiar metin ona, nu'udar animadór ita bele sai akompañadór ba oratorianu sira no lori sira atu hasoru Jezús, beematan ksolok nian.



Evanjelista Lukas de'it mak haktuir eskolante na'in rua ne'e nia esperiênsia: diálogu mak domina istória ida ne'e. liuhusi diálogu Jezús koko atu halo eskolante sira komprende akontesimentu sira, hodi haroman sira ho Maromak nia Liafuan.

Sira na'in rua hatene buat ne'ebé akontese ba Jezús, sira sasin ba buat ne'ebé mosu, maibé buat ne'e la to'o: sira la hatene lee akontesimentu sira ne'e ho matan fiar nian, sira-nia sentimentu sira no deskorajen manán sira-nia fiar, nune'e sira seidak sai sasin Moris-Hi'as nian.

No mós, sira ne'ebé la'o kle'ur hamutuk ho Jezús (karik husi hun kedas, katak tinan 3 ona), sira la hatene haree Jezús ne'ebé la'o hamutuk ho sira, mate hakoi sira-nia esperansa no sira la barani atu fiar ba sira ne'ebé ko'alia kona-ba Jezús Moris-Hias. Bainhira sira to'o Emaus, sira-nia laran komesa kaman, sira-nia neon nakraik hahú ho ksolok ki'ik ida. Maibé, bainhira Jezús tuur iha mesa no silu paun, sira komprende kedas no sira-nia ksolok "nakfera". Oras ne'e sira la presiza ona "haree" Jezús, tanba sira-nia fiar suporta sira-nia moris: sira la kole ona, sira-nia ain halai atu haklaken novidade ida ne'e, sira-nia fuan nakonu ho ksolok tanba Jezús la bosok no la husik sira, Jezús la'o hamutuk ho sira nafatin.

Pasajen ida ne'e bele sai ilas ba ita-nia moris ohin loron nian: dala hira, maski sarani, ita dada de'it ita-nia moris, lahó entusiasmu no esperansa? Dala hira ita la rekoñese Maromak nia prezensa iha ita leet? Dala hira "mate" mak manán ta-nia hanoin, lori ita atu haree de'it terus no susar, hodi la hatene haksolok ba buat ki'ik sira ne'ebé Maromak haraik iha ita-nia moris tanba Nia hakarak ita-nia ksolok?

Hanesan eskolante na'in rua ne'e, ita presiza husik ita-nia hanoin "metan", ita-nia murmurasaun kona-ba mundu no ita-nia sociedade, no hodi lee konstante Maromak nia Liafuan, hakbesik ba Jezús iha Eukaristia, ita sei sai konxiente katak Jezús Kristu moris no ita sei hetan ksolok hodi hatene katak Nia la'o hamutuk ho ita. No ksolok ida ne'e hanesan moras ida: se ksolok loos, ita sei "hada'et" ba sira ne'ebé hakbesik ita no ita sei kria ambiente ida iha ne'ebé ksolok mak karakteristika forte liu.



REFLETE liuhusi ESPERIÉNSIA SALEZIANA

Ita hahú ho ita-nia fundadór sira

“Don Bosco nune'e mós Maria Domenica Mazzarello propoin tiha ona pedagogia loos no própria ida ksolok no domin nian, hodi fó sasin kona-ba ksolok atu moris ezisténsia ida ne'ebé karakteriza ho fiar, otimizmu no esperansa, maski terus.”

No iha “Kwadru refere nian kona-ba Pastorál Juvenil Saleziana”: “Dom Bosco komprende (no halo foin-sa'e sira komprende) katak empenü no ksolok la'o hamutuk no santidade eh ksolok liga ba malu. Dom Bosco mak santu ksolok moris nian, no ninia foin-sa'e sira aprende didi'ak ninia lisaun moris nian, ho linguajen oratóriu nian ne'ebé dehan santidade katak haksolok nafatin”.

LOME 74

Kwadru p.95

“Tenke loke ba ema hotu, ho modun partikulár ba jerasaun foun sira, ba esperiénsia domin Kristu nian atu to'o neineik-neineik atu koñese Nia nu'udar sentidu moris nian. Iha triáde Sistema preventivu nian, relijiaun hetan konsiderasaun husi don Bosco la'ós de'it nu'udar objetivu prioritáriu no nu'udar konteúdu, maibé mós nu'udar dalan ba ksolok.” (hanesan mós hakerek salesianu sira iha “Kwadru refere nian...”, paj. 57)

LOME 47

“Lia-menon esplísitu fiar nian fó priviléjiu ba elementu sira ne'ebé karateriza espiritualidade saleziana: Maromak nia paternidade laran-sadi'a nian; kbiit grasa sakramental nian; sensu ekleziál no Maria nia prezensa pronta no materna; laran-manas misionáriu; moris loroloron nu'udar fatin privilejiadu enkontru nian ho Maromak, fatin konkretizasaun nian ba valór evanjéliku sira, ba buras vokasionál, ba ksolok fahe nian.”

LOME 48

“Foin-sa'e feto no mane sira konfronta an loroloron ho difikuldade no terus sira inerente ba ezisténsia umana hotu. Moris mak esperiénsia kona-ba ksolok atu eziste, atu sai boot, atu deskobre, atu hadomi, atu serbí, no atu konsege; maibé moris mós esperiénsia terus nian iha ne'ebé hetan solidaun, violénsia, insusesu, no lutu.

LOME 95

Iha foin-sa'e ida-idak nia moris, rezulta katak importante tebes sasin kona-ba laran-sadi'a no solidariedade, husi parte comunidade fiar-na'in sira-nian ne'ebé, iha Páskua nia roman, hatene interpreta evanjellu krús nian.”

“...indispensavel atu ajuda ema komprende nesidade atu fó ritmu ordenadu ba ninia moris rasik, liuhusi espasu silénsiu nian, orasaun no meditaun hodi bele sintoniza an ho Jezús nia Espíritu. Neineik-neineik foin-sa'e feto no mane sei iha gustu ba vida espirituál no sei fó lia-hatán ksolok nian ba Maromak nia bolun.”

LOME 120

LOME 150

Kona-ba edukadór/a sira: “Edukadora no edukadór sira kuda kualidade umana sira ne'ebé favorese misaun ne'ebé entrega ba sira, hanesan liberdade, kapasidade ba ekilíbriu umanu, motivasaun pesoál ne'ebé loos, konsisténsia afetiva, espiritualidade, axétika no psikolójika no loken ba relasaun ho Maromak, ho maun-alin no biin-alin sira. Nune'e, hamutuk ho profesionalizmu, sira mós tenke iha ksolok no paixaun ba edukasaun ne'ebé dudu sira atu hela nafatin iha foin-sa'e sira-nia leet ho laran-di'ak ida ne'ebé fó sasin kona-ba Maromak rasik ne'ebé hadomi sira ho domin preventivu.” No mós “animasaun nia objetivu ikus no globál mak fó fali ba ema ida-idak ksolok moris nian no aten-barani atu espera.”

Kwadru p.150

LOME 155

“Fórmula «ksolok-estudu/serbisu-piedade» ne'ebé habadak proposta estilu moris sarani nian ne'ebé oferese ba foin-sa'e sira, hatudu don Bosco nia atensaun ba sira-nia realidade konkreta iha períodu ne'ebé sira konstroi sira-nia identidade.” no “Pastorál Juvenil Salesiziana propoin espiritualidade ida ne'ebé fasilita no favorese visaun unitaria moris nian, hodi hatudu relasaun entre Maromak nia gratuidade, ksolok atu hasoru Kristu no moris iha Espíritu nia liberdade”

Kwadru p. 90

LOME 164

PERGUNTA ruma atu bele haburas ita-nia esperiénsia nu'udar animadór

- ♦ Iha tradisaun saleziana esperiénsia ksolok nian mak importante liu: nu'udar animadór, oinsá imi kontribui atu kria klima ksolok nian iha oratóriu?
- ♦ Imi, animadór sira, sai ona sasin ksolok nian? Liuhusi saida? Se seidauk, saida mak imi presiza halo atu bele moris ho karakteristika ida ne'e?
- ♦ Oinsá, nu'udar animadór, imi tulun foin-sa'e no labarik sira atu hasoru moris nia susar no terus ho atitude ksolok nian?

ORASAUN

Espíritu Santu, ne'ebé Jezús moris-hi'as promete ba eskolante sira, halo Kristu nia Kreda sai Isin lolon ida de'it, halo ami bele hetan esperiénsia komuñau nian hodi fó sasin kona-ba Ita-nia prezensa iha ema hotu nia leet. Ita ne'eb'e prepara ema sira ba misaun, tulun ami atu rekoñese Maromak nia fini di'ak iha ami-nia sosiedade. Tulun ami atu sai kolaboradór ksolok nian ba ema sira ne'ebé ami hasoru, liuliu labarik no foin-sa'e sira, hodi haklaken ita nia Liafuan, Evanjellu ksolok nian